

Los ntawm Thawj Tswj Hwm
Thomas S. Monson



“Kawm tej uas Kuv Qhia”

Nyob hauv Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg, peb txhua tus yog cov kws qhia thiab peb txhua tus yog cov uas kawm. Tus Tswv caw txhua tus los ua li no: “Kawm tej uas kuv qhia . . . nej thiaj yuav tau so.”¹

Kuv caw txhua tus Neeg Ntseeg hauv Hnub Nyoog Kawg kom xav txog tej yam uas lawv ua tau kom qhia thiab kawm thiab cia tus Cawm Seej coj peb thaum peb ua li ntawd. Peb paub hais tias “tus xib hwb uas Vajtswv txib los”² tsis yog ib tug xib hwb xwb. Tus uas qhia peb kom peb hlub tus Tswv peb tus Vajtswv kawg siab kawg ntsws kawg dag kawg zog, thiab hlub peb cov kwv tij ib yam li peb hlub peb tus kheej, Nws yog tus Xib Hwb thiab tus Coj Yam Ntxwv txog lub neej zoo tag nrho.

Nws yog tus uas tau tshaj tawm hais tias: “Los nrog kuv mus,”³ “Kuv tau ua ib tug yam ntxwv rau nej.”⁴

Yog Nej Tsis Hloov Siab Los Ntseeg

Yexus tau qhia ib qho tseeb uas yooj yim to taub thiab tseem ceeb nyob hauv phau Mathais. Tom qab Nws thiab Nws cov thwj tim tau nqis los ntawm lub Roob Hloov Hlo los, lawv so ib chim nyob ntawm Kalilais ces mus rau Kapena-us. Nyob ntawd cov thwj tim tuaj nug Yexus, hais tias:

“Leej twg yog tus loj dua ntais saum ntuj ceeb tsheej”

“Yexus hu ib tug me nyuam yaus los sawv ntawm lawv xub ntiag,

“Thiab hais tias, Kuv qhia tseeb rau nej hais tias, *yog nej tsis hloov [siab los ntseeg]* kom zoo li tug me nyuam yaus no . . . , ces nej yuav tsis tau mus saum ntuj ceeb tsheej.”⁵

Nyob hauv lub Koom Txoos no, lub hom phiaj ntawm kev qhia txog txoj moo zoo tsis yog ua kom tso tej lus qhia nyob rau hauv Vajtswv cov me nyuam lub siab, txawm yog lawv nyob hauv tsev, hauv chav kawm, los yog qhov chaw tshaj tawm txoj moo zoo. Lub hom phiaj tsis yog ua kom lawv paub tias ib tug niam tsev, txiv tsev, tus xib hwb, los yog tus tub txib txawj ntse npaum li cas. Tsis yog ua kom tib neeg paub ntxiv txog tus Cawm Seej thiab Nws lub Koom Txoos.

Lub hom phiaj ntawm kev qhia txog txoj moo zoo yog ua kom pab Leej Txiv Saum Ntuj Ceeb Tsheej cov tub thiab cov ntxhais rov qab mus nrog Nws nyob thiab muaj txoj sia nyob mus ib txhis nrog Nws. Yog peb xav ua li no, kev qhia txog txoj moo zoo yuav tsum pab lawv xav coj raws li Nws txhua hnub thiab ua raws li tej kev khi lus dawb ceev. Lub hom phiaj yog kev tshoov tib neeg lub siab kom lawv xav txog, ces coj raws li tej ntsiab cai ntawm txoj moo zoo. Lub hom phiaj yog qhov uas peb yuav muaj kev ntseeg tus Tswv Yexus Khetos thiab *hloov siab los ntseeg* Nws txoj moo zoo.

Tej lus qhia uas foom koob hmoov thiab hloov siab los ntseeg thiab cawm lwm tus yog tej lus qhia Cov xib hwb uas coj yam ntxwv zoo li tus Cawm Seej yog cov uas hlub thiab pab cov uas lawv qhia. Lawv tshoov cov uas mloog

lawv tej lus qhia lub siab thaum lawv qhia txog qhov tseeb uas nyob mus ib txhis. Lawv ua neej uas tsim nyog coj raws li lawv tus yam ntxwv.

Hlub thiab Pab

Tag nrho tus Cawm Seej txoj hauv lwm qhuab qhia yeej ua yam ntxwv txog kev hub yus tus neeg zej zog. Muaj tseeb tiag, tej yam Nws qhia yeej yog los ntawm Nws txoj kev hlub thiab txoj kev pab lwm tus. Yog li ntawd, cov xib hwb uas kuv nco ntsoov yog cov xib hwb uas paub, hlub, thiab saib xyuas lawv cov tub ntxhais kawm. Lawv nrhiav cov yaj uas poob zoo. Lawv qhia tej yam txog lub neej no uas kuv yeej yuav nco ntsoov.

Ib tug xib hwb kuv nco txog yog Lucy Gertsch. Nws paub nws txhua tus tub ntxhais kawm ntawv. Cov uas tsis tuaj thaum Hnub Caiv ib zaug los sis yeej tsis tuaj los nws yeej hu tsis tu tsis tseg. Peb twb paub tias nws hlub peb. Peb txhua tus yeej nco ntsoov nws thiab nws tej lus qhia.

Ntau xyoo tom qab ntawd, thaum Lucy yuav luag tas sim neej no, kuv mus ntsib nws. Wb tau sib tham txog lub sij hawm dhau los thaum nws yog peb tus xib hwb. Wb sib tham txog txhua tus nyob hauv peb chav kawm thiab sib tham txog qhov uas txhua tus ua neej li cas. Nws txoj kev hlub twb kav ntev tas ib sim neej.

Kuv nyiam tus Tswv tej lus txib uas nyob hauv phau Lus Qhuab Qhia thiab Kev Khi Lus uas hais tias:

Tus Tswv muab ib lo lus txib rau peb kom peb ib leeg qhia ib leeg txog txoj lus qhuab qhia ntawm lub nceeg vaj.

Peb yuav tsum rau siab ntso qhia thiab Nws lub hwj chim yuav nrog peb nyob.⁶

Lucy Gertsch rau siab ntso qhia vim nws hlub peb tsis tu tsis tseg.

Ua Kom Lwm Tus Muaj Kev Cia Siab thiab Qhia Qhov Tseeb

Tus Thwj Tim Pov Lauj hais tias: “Neej yuav tsum npaj tos txhua lub sij hawm, yog thaum twg muaj neeg nug nej hais tias vim li cas nej muaj chaw cia siab, thaum ntawd nej thiaj paub teb lawv.”⁷

Tej zaum qhov kev cia siab loj tshaj plaws uas ib tug xib hwb qhia tau yog los ntawm qhov tseeb ntawm Yexus Khetos txoj moo zoo.

“Thiab nej yuav cia siab rau yam dab tsi? Maumoos nug hais tias, “Saib seb kuv hais rau nej tias nej yuav tsum muaj txoj kev cia siab dhau los ntawm Khetos thiab lub hwj chim ntawm nws txoj kev sawv hauv qhov tuag rov qab

los, tias yuav sawv los mus rau txoj sia nyob mus ib txhis, thiab tau qhov no los vim nej txoj kev ntseeg . . . nws.”⁸

Cov xib hwb, cia li tsa nej lub suab thiab ua tim khawv txog qhov uas Pawg Vajtswv tej cwj pwm zoo li cas tiag. Hais nej zaj lus tim khawv txog Phau Ntawv Maumoos. Cia li qhia qhov tseeb zoo tshaj plaws uas nyob hauv txoj kev cawm seej. Siv cov ntaub ntawv uas lub Koom Txoos pom zoo rau, qhov tseem ceeb tshaj plaws yog cov vaj lug kub, kom qhia qhov tseeb txog Yexus Khetos txoj moo zoo uas tau muab txum tim rov qab los. Cia li nco txog tus Cawm Seej cov lus txib kom “tshawb nrhiav tej vaj lug kub; rau qhov nej xav hais tias tej vaj lug kub ntawd yuav cawm tau nej txoj sia mus ib txhis; thiab tej no yog ua tim khawv txog kuv.”⁹

Cia li pab Vajtswv cov me nyuam to taub hais tias qhov twg yog qhov tseem ceeb thiab qhov tseeb ntawm lub neej no. Pab lawv muaj dag muaj zog txaus xaiv tej kev uas yuav pab lawv mus txais txoj sia nyob mus ib txhis.

Cia li qhia qhov tseeb, thiab tus Vaj Ntsuj Plig Dawb Huv yuav pab nej.

“Kawm tej uas Kuv Qhia”

Vim Yexus Khetos mloog lus tag nrho thiab ua raws li Nws Leej Txiv hais, Nws “loj hlob zoo, muaj tswv yim, [thiab] ua haum Vajtswv siab thiab haum neeg siab.”¹⁰ Peb puas rau siab ua ib yam li ntawd? Ib yam li Yexus nws txais ib qho txuj ci tas mam li txais ib qho ntxiv,¹¹ peb yuav tsum ua siab ntev thiab rau siab nrhiav qhov kaj thiab kev txawj nse los ntawm Vajtswv thaum peb kawm txog txoj moo zoo.

Kev mloog lus yog ib qho tseem ceeb ntawm kev kawm. Thaum peb npaj siab kawm, peb thov Vajtswv kom txais tau kev tshoov siab thiab kev pom zoo los ntawm tus Vaj Ntsuj Plig Dawb Huv. Peb xav ntsoov, thov Vajtwv, ua raws li tej lus qhia txog txoj moo zoo, thiab peb nrhiav kom paub Leej Txiv lub siab nyiam rau peb.¹²

Yexus “ua lus piv txwv qhia ntau zaj,”¹³; uas ua kom yus yuav tsum muaj pob ntseg mloog lus, qhov muag pom kev, thiab lub siab uas xav to taub. Thaum peb ua neej tsim nyog, peb haj yam muaj peev xwm hnov tau tus Vaj Ntsuj Plig Dawb Huv tej lus ntxhi, uas “qhia [peb] txhua yam, thiab ua rau [peb] nco qab txog txhua yam.”¹⁴

Thaum peb teb tus Tswv tej lus caw mos muag kom peb “Kawm tej uas kuv qhia,” peb txais yuav Nws lub hwj chim saum ntuj ceeb tsheej. Yog li ntawd, cia peb muaj

zog mus tom ntej mloog lus, ua raws li tus uas Coj Yam Ntxwv Zoo qhia raws li Nws xav kom peb qhia thiab kawm raws li Nws xav kom peb kawm.

LUS CIM

1. Mathais 11:29.
2. Yauhas 3:2.
3. Lukas 18:22.
4. 3 Nifais 18:16.
5. Mathais 18:1-3; ntxiv qhov uas ntawv qaij.
6. Lus Qhuab Qhia thiab Kev Khi Lus 88:77-78.
7. 1 Petus 3:15.
8. Maulaunais 7:41.
9. Yauhas 5:39.
10. Lukas 2:52.
11. Lus Qhuab Qhia thiab Kev Khi Lus 93:12.
12. Saib Yauhas 5:30.
13. Malakaus 4:2.
14. Yauhas 14:26.

QHIA LOS NTAWM TSAB XOY NO

Thawj Tswj Hwm Monson caw peb kom "xav txog tej yam uas [peb] ua kom qhia thiab kawm thiab cia tus

Cawm Seej coj peb thaum peb ua li ntawd." Tej zaum koj yuav xav nrhiav hauv cov vaj lug kub nrog cov uas koj mus xyuas kom kawm txog Yexus Khetos txoj kev qhia thiab txoj kev kawm. Tej zaum koj yuav xav siv tej nqe vaj lug kub uas Thawj Tswj Hwm Monson hais, xws li Mathais 11:29, Yauhas 5:30, thiab Malakaus 4:2. Tej zaum koj yuav xav sib tham txog qhov uas tej uas yus tau kawm txog Khetos yuav ua li cas pab yus "txais yuav Nws lub hwj chim uas los saum ntuj ceeb tsheej los."

COV ME NYUAM

Kev Kawm txog Yexus

Tus Vaj Ntsuj Plig Dawb Huv ua rau peb nyob kaj siab lug kom pab peb paub tias Yexus muaj txoj sia nyob tiag tiag thiab Nws hlub peb. Cia li sau los yog kos duab txog ib yam dab tsi uas koj tau kawm txog Yexus.



Tsim Tau Kom Zoo Nkaus Li Vajtswv

Kev Ntseeg, Tsev Neeg, Kev Pab

Ua tib zoo thov Vajtswv kawm tej yam no thiab nug seb koj yuav tsum qhia dab tsi. Qhov uas koj to taub “Tsev Neeg: Ib zaj Lus Tshaj Tawm rau lub Ntiaj Teb” yuav ua li cas kom koj txoj kev ntseeg Vajtswv loj zuj zus thiab foom koob hmoov rau cov uas koj mus saib xyuas tom tsev? Kom tau ntaub ntauv xov xwm ntxiv, cia li txuas rau reliefsociety.lds.org.

Vajtswv hais tias, Nim no peb yuav tsim neeg kom muaj yam ntxwv zoo li peb. . . .

“Vajtswv thiaj tsim neeg, kom lawv muaj yam ntxwv zoo li Vajtswv ntag. Nws tsim muaj tus txiv nee thiab tus poj niam” (Chiv Keeb 1:26–27).

Vajtswv yog peb Leej Txiv Saum Ntuj Ceeb Tsheej, thiab Nws tau tsim peb kom muaj yam ntxwv zoo li Nws. Thawj Tswj Hwm Thomas S. Monson hais txog qhov tseeb no hais tias: “Vajtswv peb Leej Txiv muaj pob ntseg hnov peb tej lus thov. Nws muaj qhov muag pom tej yam peb ua. Nws muaj qhov ncauj uas hais lus rau peb. Nws muaj ib lub siab hlub peb. Muaj Nws tiag tiag. Nws muaj txoj sia nyob. Peb yog nws cov me nyuam uas Nws tsim kom zoo li Nws. Peb muaj yam ntxwv zoo li Nws thiab Nws muaj yam ntxwv zoo li peb.”¹

“Tsoom Haiv Neeg Ntseeg hauv Hnub Nyoog Kawg pom hais tias tag nrho txhua tus neeg yog Vajtswv cov me nyuam tiag tiag li; lawv xav hais tias txhua tus neeg muaj tus cwj pwm thiab muaj peev xwm rais los ua neeg zoo li Vajtswv.”² Txhua tus yog “ib tug ntsuj plig tub los sis ntxhais ntawm ib khub niam txiv saum ntuj ceeb tsheej.”³

“[Tus Yaj Saub] Yauxej Xamiv kuj tau kawm hais tias Vajtswv xav kom Nws cov me nyuam txais kev tsa nto ib yam li Nws muaj.”⁴ Zoo li Vajtswv tau hais tias, nov yog Nws txoj hauv lwm thiab Nws lub yeeb koob—ua kom tib neeg tsis txawj tuag thiab tau txoj sia nyob mus ib txhis (saib Mauxes 1:39).

Vaj Lug Kub Ntxiv

Chiv Keeb 1:26–27; 1 Kauleethaus 3:17; Lus Qhuab Qhia thiab Kev Khi Lus 130:1

Los ntawm cov Vaj Lug Kub

Nyob hauv Phau Ntawv Maumoos Tsales tus tij laug nrhiav txoj kev kom muaj teeb nyob hauv yim lub nkoj uas yuav thauj cov Neeg Yales hla cov dej mus rau thaj av uas tau cog lus tseg lawm. Nws “tau muab ib lub pob zeb los nchuav ua kaum rau lub me nyuam pob zeb” thiab thov Vajtswv kom Nws “kov cov pob zeb no” nrog Nws tus ntiv tes “kom [cov pob zeb no] yuav ci pom kev nyob hauv qhov tsaus ntuj.” Thiab Vajtswv “tau cev nws txhais tes tawm thiab kov cov pob zeb ib lub dhau ib lub nrog nws tus ntiv tes.” Daim ntaub thaiv tau raug qhib tawm ntawm Tsales tus tij laug lub qhov muag, thiab

“nws tau pom tus Tswv tus ntiv tes; thiab nws zoo li neeg tus ntiv tes. . . .

“Thiab tus Tswv tau hais rau nws tias: Koj puas ntseeg tej lus uas kuv yuav hais?

“Thiab nws tau teb tias: Muaj tseeb tiag, tus Tswv es.”

Thiab “tus Tswv tau ua nws tus kheej rau [Yales tus tij laug] pom” thiab hais tias, “Koj puas pom tias koj tau raug tsim muaj tus yam ntxwv ib yam li kuv?” Muaj tseeb tiag, tag nrho tib neeg sawv daws tau raug tsim thaum chiv keeb muaj tus yam ntxwv zoo ib yam li kuv.” (Saib Ethaws 3:1–17.)

LUS CIM

1. Thomas S. Monson, “I Know That My Redeemer Lives,” nyob hauv Conference Report, Plaub Hlis Ntuj 1966, 63.
2. Gospel Topics, “Becoming Like God,” topics.lds.org; kuj saib Mauxes 7:31–37.
3. “Tsev Neeg: Ib zaj Lus Tshaj Tawm rau lub Ntiaj Teb,” *Liahona*, Kaum Ib Hlis Ntuj 2010, 129.
4. Gospel Topics, “Becoming Like God,” topics.lds.org; kuj saib *Teachings of Presidents of the Church: Joseph Smith* (2007), 221.

Xav Txog Qhov No

Qhov uas peb paub tias Vajtswv tau tsim txhua tus neeg kom muaj yam ntxwv zoo li Nws pab peb li cas thaum peb nrog lwm tus sib tham?